


01 novambra 2022

Fankalazana ireo olomasina



Ry Kristianina havana, amin'izao voalohan'ny volana novambra izao no ankalazan'ny Eglizy amin'ny fomba manetriketrika ireo olomasina rehetra. Ny antony dia tsotra ihany satria tsy izay voasoratra ao amin'ny kalandrie mahazatra antsika ihany no olomasina fa izay miombona amin'Andriamanitra nandritra ny fiainany. Izay niainany teto ihany koa no iainany any an-koatra ka miombom-piainana miaraka amin'ny anjely midera an'Andriamanitra ireo havantsika olomasina sady reharehantsika satria tody soa aman-tsara any izy ireo no sady voninahitr'Andriamanitra. Izany tokoa no anton'ireny

fankalazana ireny, ny fankalazana ny olomasina dia ny fankalazana ny voninahitr'Andriamanitra satria ireo olomasina ireo tsy hoe izy ireo no mendrika fa nandray an'Andriamanitra izy ireo, nantsoin'Andriamanitra hiombona Aminy ka nomen'Andriamanitra fahasoavana manokana ho fanehoana ny voninahiny satria

Vakiteny I : Apôk. 7, 2-4. 9-14

Tononkira : Salamo 23

Vakiteny II : 1 Jo. 3, 1-3

Evanjely : Mt. 5, 1-12a

ny antony voalohany indrindra ny fiainan'olomasina dia fanomezam-boninahitra an'Andriamanitra. Masina tokoa izay miombona amin'Andriamanitra.

Ny faharoa dia manambara amintsika fa ohatra velona ho antsika izy ireo satria afaka niaina niaraka tamin'i Kristy teo amin'ny fianany ka tafiditra amin'ny voninahiny. Modely ho antsika izy ireo eo amin'ny ezaka ataontsika amin'ny fiombonana amin'Andriamanitra na dia samy manana ny fomba ivelomana an'izany aza ny tsirairay.

Ny fahatelo araka ny tonom-bavaka atao : “Ry Andriamanitra Rainay ô, nomenao anay ity andro ity hanomezana voninahitra ny olomasina rehetra tsy tambo isaina mivavaka ho anay ka hahazoanay ny famindram-ponao”. Sambatra isika fa manana mpivavaka.

Ao anatin’ny fiomanana akaiky dia akaiky ny fankalazana ny tapany voalohany amin’ny fiarahan-dia ataontsika amin’izao Sinaody faha-7 izao isika no mibanjina ireo havantsika tafita ary izy ireo koa mivavaka ho antsika ka feno fitokisana isika hiroso lalindalina kokoa mba ho fianakaviana eglizy kely miara-mivavaka sy miara-mandalina ny finoana ka ho tonga EGLIZY OLO VELO VELOMIN’NY BATEMY MIOMBONA MIARA-DALANA MANDRAY AN-TANANA ZARY MISIONERA TABERNAKLA VELONA.

Ireo vakiteny aroson’ny Eglizy androany dia hanampy antsika hibanjina ny voninahitr’Andriamanitra miaraka amin’olomasina ka manomana antsika dieny izao hivelona tahaka azy ireo. Atolotry ny Evanjely amintsika ny fandaharam-piainana hahafahantsika ho tafita tahaka azy ireo, izany ilay fahasambarana valo izay norenesintsika tamin’ny Evanjely.

Ny vakiteny voalohany taratasin’i Md Joany na koa ny Apokalipsa dia maneho amintsika ny fiainan-ko avy. Tsy tambo isaina ireo olomasina any an-danitra any ka samy tretrika tokoa ireo olomasina ireo araky ny tononkira fanaontsika, sambatra sy tretrika izy ireo, izany no lazain’ny vakiteny voalohany. “Efatra arivo sy efatra alina sy iray hetsy” izay tandindon’ny isa roa ambin’ny folo ampiana arivo ka mameno izay isa izay ho efatra arivo. Tsy izay no isa fa tandindon’ny hafenoana izany, tonga any daholo ny vahoakan’Andriamanitra izay miombona amin’Andriamanitra ka manao vavaka sy fiderana ary fisaorana izy ireo. Manao ankanjo fotsy ary mihoby an’Andriamanitra miaraka amin’ny anjely, izany no miandry antsika raha miombom-piainana amin’Andriamanitra isika. Tsy noho ny fahamendrehantsika fa noho ny fitiavan’Andriamanitra.

Antitranterin’i Md Joany ao amin’ny vakiteny faharoa fa lehibe tokoa ny fitiavan’Andriamanitra antsika ary dia miantso antsika hiombona Aminy Andriamanitra, miantso antsika ho zanany lzy ary dia zanany tokoa isika. *“Ry hava-malala, zanak’Andriamanitra isika ankehitriny, nefa mbola tsy naseho izay ho tena toetrantsika ; fa amin’ny andro hampisehoana izany, dia fantatsika fa hanahaka Azy isika, satria ahita Azy araka ny tena toetrany.”* Noharian’Andriamanitra mitovy endrika Aminy isika, ho tanteraka izany ao amin’ny fiainana mandrakizay ao amin’Andriamanitra satria miombona tanteraka Aminy isika. Miombona amin’Andriamanitra no dikan’ny hoe : “masina”, ilay toetra nananantsika hatramin’ny voalohany noharian’Andriamanitra antsika dia ho tanteraka rehefa tonga any amin’ny fiainana mandrakizay isika satria ny “masina” dia mira “miombona amin’Andriamanitra”.

Raha te-hahazo ny hasambarana isika dia ambaran’i Jesoa ao amin’ny Evanjely ny lalana mankany amin’ny hasambarana izay midika ihany koa fiombonana amin’Andriamanitra , io no fakafakain’ny Papa amin’ny taratasiny miantso amin’ny fahasinanana. Antsoin’Andriamanitra amin’ny fahasinanany isika. Ireo toetra ao amin’i Jesoa ao amin’ny hasambarana valo no lalana izorantsika mankany amin’izany hasambarana izany. Araka izany tsy ny fananana no manambara na mitondra amin’ny fahasambarana fa ny toe-piainana.

Inona ary àry ireo hasambarana ambaran’ny Evanjely ? tsy valo fa mamintina azy ny hasambarana fahasivy dia ny hoe sambatra ianareo raha tevatevaina sy enjehina ary ampangaina lainga noho ny amiko, mifalia sy miravoa ianareo fa lehibe ny valisoanareo any an-danitra. Io fahasivy io no mamintina ny hasambarana valo voalaza.

Lazain'i Jesoa sy atolony antsika ny làlan-kombana, toro-làlana no omeny hahafahantsika hanana toe-piainana ilaina ka hahatody antsika amin'ilay hasambarana voalazantsika teo. Voalaza matetika fa mifanohitra amin'ny fiheveran'izao tontolo izao satria tsy araky ny hevitr'izao tontolo izao ny hasambarana voalazan'i Jesoa mitondra antsika amin'ny fiainana mandrakizay, ny an'izao tontolo izao dia mifara amin'izao tontolo izao. Tian'ny Eglizy asongadina izany androany, ny hasambaran'izao tontolo izao dia mandalo miserana, mihelina avokoa, mandalo ny hasambarana ka mamitaka antsika ireny rendrarendra ireny, ny hasambaran'izao tontolo izao dia hasambarana fananana. Ny hasambarana torin'i Jesoa kosa dia ny toetrantsika izay iezahantsika hanana ny endrika maha zanak'Andriamanitra antsika. Io toetra io no hiezahantsika. Marina fa mifanohitra amin'izao tontolo izao izay toetra manilikilika ny olona izany, fa kosa ireo olontsambatra Victoire, Lucien, Rafiringa dia nanana izany toetra maha-zanak'Andriamanitra izany, niainany teto an-tany miaraka mitoetra amin'i Jesoa.

Sambatra ny mahantra am-panahy fa azy ny fanjakan'Andriamanitra, nolazain'i Jesoa io raha nanome tso-drano ireo ankizy Izy satria tsy mirehareha na mipoerapoera izy ireo fa matoky an'Andriamanitra, manana ny toetra maha-zanak'Andriamanitra isika izay mitoky aminy.

Sambara ny malemy fanahy fa handova ny tany izy, tsy manao herisetra fa manana fanetren-tena, manana fitiavana manokana ka tia ny hafa, tsy manapotika ary dia fantantsika izany fa mandova ny tany. Hitantsika ireo fanapotehina vokatry ny herisetra, raha tiantsika ny ho sambatra dieny izao dia halemy fanahy isika ka hanaja ny tontolom-piainantsika.

Sambatra izay mitomany fa halana alahelo, sambatra izay mikatsaka ny mpanafaka alahelo ary tokana ny mpanafaka alahelo dia Andriamanitra Ray be famindram-po ka matoky an'Andriamanitra, tahaka ny nolazain'i Jesoa tamin'ireo zaza nomeny tso-drano.

Sambatra izay noana sy mangetaheta ny fahamarinana, ny marina no maha-olona afaka antsika, izay manao ny marina no mendrika, ary izany no hahazoantsika fahendrena, ny fahendrena dia i Jesoa Kristy.

Sambatra ny mamindra fo fa hamindrana fo izy, lazain'ny Papa matetika fa tsy hisy ny fandriampahalemana sy ny fihavanana marina raha tsy misy ny famindram-po sy ny famelan-keloka, raha te ho sambatra isika sy hahazo ny fiadanana marina dia aoka ho vonona mamindra fo amin'ny manodidina antsika.

Sambatra ny madio fo hahita an'Andriamanitra izy, io ilay toetran'i Masina Maria sy toetran'ny zazakely miombona tanteraka amin'Andriamanitra, io no voalazantsika tamin'ny famakafakana ny taratasy nosoratan'I Md Joany.

Sambatra ny tia fihavanana fa antsoina hoe zanak'Andriamanitra izy satria ny fihavanana marina torin'i Jesoa ka nanolorany ny ainy teo amin'ny hazo fijaliana dia tsy misy fihatsarambelatsihy, raha izany fihavanana izany no iainantsika dia ilay tena fihavanana mampiombona fa tsy ny fihavanana atero ka alao. Ny fihavanana ambaran'i Kristy no tena izy. Io no itovizantsika endrika amin'Andriamanitra ilay noharian'Andriamanitra antsika.

Sambatra ny miaritra ny fanenjehana noho ny marina fa azy ireo ny fanjakan'Andriamanitra, ny fanaovana ny marina no mampiombona antsika amin'Andriamanitra ka noho izany mitondra antsika amin'ny fahasambarana maha zanak'Andriamanitra.

Ry Jesoa ô ambaranao anay ireo toetra tsara hanananay mba hahazoanay ny hasambarana. Mankasitraka Anao izahay ry Jesoa noho izany fahasoavana nomenao anay amin'ny alalan'ny vavak'ireo olomasina izany izay manambara fa ao Aminao ihany no tsy maintsy hiafaranay raha miombona tanteraka Aminao izahay araky ny voalazan'I Md Augustin : *“tsy hitony ny voninahitra sy ny hetahetamponay raha tsy ao Aminao”*. Noharianao hitovy endrika Aminao izahay ka ampianaro mba ho tena taranaka manorina tokoa, manorina Eglizy Tranon'Andriamanitra sy Eglizy Olona Velona ka amin'izay ho tody soa aman-tsara any an-danitra mankalaza sy midera an'Andriamanitra miaraka amin'ireo olomasina. Masina Maria Reny Mpanjakavavin'ny Olomasina tantano ny dianay ho tody amin'izao Sinaody izao ka hanampy anay hametraka torolanana hampivelatra ny finoana ka hahaizany koa manamasina ny fiainanay ka tonga any amin'ny fiainana mandrakizay. Md Josefa ampianaro ny fianakaviana eglizy kely hahay hiombona amin'Andriamanitra amin'ny vavaka sy amin'ny fiainana andavanandro. Amen

Mompera Arseveka Mgr Benjamin Ramaroson